



# Icyegeranyo cy'amakuru y'imikino yaranze icyumweru

2023

Taliki 22-26 Ukuboza



P.1 Beach Volleyball : u Rwanda rwabonye itike y'imikino y'Afurika

## Ijambo ry'ibarange

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'l'mikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigisimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

## Ibirimo

- P1 **Beach Volleyball**: u Rwanda rwabonye itike y'imikino y'Afurika
- P2 **Football**: Warren Zaïre-Emery ukinira PSG yasuye u Rwanda
- P2 **Cycling**: SKOL yahaye FERWACY inkunga y'ibikoresho
- P3 **Aquathlon**: Ishimwe Héritier yitwaye neza muri Qatar
- P3 **Karate**: Flying Eagles yegukanye shampiyona y'abakiri bato
- P4 **Swimming**: Habaye inama y'Inteko Rusange ya RSF
- P4 **Cycling**: Muhoza na Ingabire begukanye "Akagera Rhino Race 2023"

# Beach Volleyball : u Rwanda rwabonye itike y'imikino y'Afurika

Taliki 20 kugeza 23 Ukuboza 2023 i Mombasa muri Kenya habereye imikino y'Akarere ka 5 mu mukino wa Volleyball ikinirwa ku mucanga "Beach Volleyball" yari igamije gushaka itike y'imikino Olempike 2024 "CAVB Zone 5 Beach Volleyball Qualifiers 2023".

Iyi mikino yari yitabiriwe n'ibihugu 5 mu bagabo na 4 mu bagore. U Rwanda rwari ruhagarariwe n'amakipe abiri mu bagabo ari yo Ntagenga Olivier wafatanyaga na Gatsinzi Venuste ndetse na Rwigema Gloire wafatanyaga na Akumuntu Cavalo Patrick.

Mu bagore hari amakipe abiri, ikipe ya Munezero Valentine wafatanyaga na Mukandayisenga Benitha naho indi kipe yari igizwe na Uwiringiyimana Albertine na Tuyishime Aloysie.

## Uko irushanwa ryagenze

Mu bagabo amakipe uko ari 5 yakinnye hagati yayo maze ikipe ya Misiri iba iya mbere ikurikirwa n'u Rwanda, Kenya, u Burundi na Uganda. Mu bagore, Misiri yabaye iya mbere ikurikirwa na Kenya, u Rwanda n'u Burundi.

Amakipe 3 ya mbere mu bagabo (Misiri, Rwanda na Kenya) ndetse n'andi 3 ya mbere mu bagore (Misiri, Kenya n'u Rwanda) yabonye itike y'imikino yo ku rwego rw'Afurika "CAVB Continental Cup 2024" akaba ari yo azatanga itike y'amakipe azaserukira Afurika mu mikino Olempike 2024 izabera i Paris mu Bufaransa muri Nyakanga na Kanama 2024.

Aya makipe kandi yahise akatisha itike y'imikino rusange y'Afurika "African Games 2023" izabera Accra muri Ghana taliki 8 kugeza 23 Werurwe 2024.

Mu mikino iheruka muri 2019 yabereye muri Maroc, ikipe y'u Rwanda yari igizwe na Ntagengwa Olivier na Akumuntu Kavaloo Patrick yegukanye umudali w'Umulinga.



## Football : Warren Zaire-Emery ukinira PSG yasuye u Rwanda

Taliki 21 kugeza 23 Ukuboza 2023, binyuze muri gahunda ya "Visit Rwanda", umukinnyi wo hagati mu ikipe ya PSG mu cyiciro cya mbere mu Bufaransa, Warren Zaire-Emery yasuye u Rwanda.

Uyu mukinnyi usanzwe akomoka mu Bufaransa yasuye urwibutso rwa Jenoside yakorewe Aba Tutsi mu 1994 ku Gisozi. Yabonanye n'abana barererwa mu ishuri ry'umupira w'amaguru rya PSG riri i Huye ariko umuhango wabereye kuri Kigali Pelé Stadium i Nyambirambo.

Uyu mukinnyi, Warren Zaire yasuye Parike y'ibirunga ababarizwa ingagi anasura Hotel iri mu bwato mu Karere ka Karongi " Mantis Kivu Queen Uburanga Hotel".

Kuva muri 2019 ubwo u Rwanda rwagiranaga amasezerano y'u Bufatanye na PSG, Warren Zaire-Emery yabaye umukinnyi wa 5 w'iyi kipe usuye u Rwanda nyuma ya Sergio Ramos, Keylor Navas, Julian Draxler na Thilo Kehrer baje mu Rwanda muri 2022.

Gusa uretse abakinnyi hari n'abakunyujijeho muri iyi kipe basuye u Rwanda barimo Youri Djorkaeff, Raí, Ludovic Giuly, Juan Pablo Sorin, Pauleta na Bernard Lama.




## Cycling : SKOL yahaye FERWACY inkunga y'ibikoresho

Taliki 22 Ukuboza 2023, uruganda rwenga ibinyobwa "SKOL Brewery Ltd" rwashyikirije ishyirahamwe ry'umukino w'amagare mu Rwanda "FERWACY" inkunga y'ibikoresho mu rwego rwo gufasha mu iterambere ry'umukino w'amagare mu Rwanda.

Uyu muhango wabereye aho uru ruganda rukorera mu Nzove ahari umuyobozi mukuru wa SKOL, Eric Gilson na Perezida wa FERWACY, Ndayishimiye Samson.

Ibikoresho byatanzwe harimo amagare 17 agezweho n'ibikoresho byayo, hari kandi imyambaro 594, imyambaro 66 y'inkweto, uturindantoki 39, ingofero 104, amacupa batwaramo amazi 500 ndetse n'ibihembo bihabwa amakipe yitwaye neza 116.



## Aquathlon : Ishimwe Héritier yitwaye neza muri Qatar

Taliki 23 Ukuboza 2023 muri Qatar habereye irushanwa mpuzamahanga rya "Aquathlon" aho abakina boga "Swimming" bakaniruka n'amaguru "Run".

Iri rushanwa mpuzamahanga "Viva Bahriya Aquathlon 2023" mu cyiciro cy'abafite imyaka hagati ya 20 na 29, umukinnyi w'Umunyarwanda, Ishimwe Héritier ukinira CS Karongi yitwaye neza yegukana umwanya wa mbere aho yakoresheje iminota 39 n'amasegonda 42. Yakurikiwe na Thomas Strettle wo mu Bwongereza wakoreshje iminota 42 n'amasegonda 16 naho ku mwanya wa 3 haza Berdoudi Zakaria wo muri Algeria wakoreshje iminota 44 n'amasegonda 02.

Iri rushanwa ryari ryitabiriwe n'abakinni 150 bari baturutse mubihugu bitandukanye ku lsi.



## Karate : Flying Eagles yegukanye shampiyona y'abakiri bato

Taliki 23 na 24 Ukuboza 2023 mu Karere ka Huye habereye shampiyona y'abakinni bari hagati y'imyaka 7 na 14 yateguve n'ikipe ya Zanshin Karate Academy ikorera mu Karere ka Huye ku bufatanye n'ishyirahamwe ry'umukino wa Karate mu Rwanda "FERWAKA".

Iri rushanwa ryabereye muri Credo Hotel ryari ryitabiriwe n'abakinni 200 bari mu makipe 27 yari yaturutse mu gihugu hose aho abakinni bahatanye mu kwiyereka "Kata" ndetse no kurwana "Kumite".

Ikipe ya Flying Eagles ni yo yegukanye umwanya wa mbere nyuma yo kwegukana imidali 11 harimo 7 ya Zahabu, 3 ya Feza n'undi umwe w'Umulinga. Ku mwanya wa kabiri haje ikipe ya Les Petits Samurai Karate-Do yegukanye imidali 8 naho ku mwanya wa 3 haza ikipe ya The Champions Sports Academy nayo yegukanye imidali 8.

Ikipe ya Zanshin Karate Academy yateguye irushanwa yegukanye umwanya wa 16 n'imidali 4.



## Swimming : Habaye inama y'Inteko Rusange ya RSF

Taliki 23 Ukuboza 2023 habaye inama y'Inteko Rusange isanzwe y'ishyirahamwe ry'umukino wo Koga mu Rwanda "RSF".

Muri iyi nama abanyamuryango bagaragarijwe raporo y'ibikorwa by'umwaka wa 2022-2023 byaranzwe ahanini n'amahugurwa y'abatoza n'abasifuzi ndetse n'amarushanwa yabereye imbere mu gihugu arimo imikino y'Akarere ka 3 ndetse no hanze y'igihugu.

Hagaragajwe kandi gahunda y'ibikorwa biteganyijwe mu mwaka w'imikino wa 2024 bizabimburirwa na shampiyona y'Isti izabera i Doha muri Qatar, taliki 10 kugeza 17 Gashyantare 2024. Hazaba kandi na shampiyona y'igihugu, imikino yo kwibuka, shampiyona y'Afurika, imikino y'Akarere ka 3, imikino Olempike n'ibindi bitandukanye.

Abanyamuryango ba RSF banagaragarijwe ishusho y'imikoresherezwe y'umutungo mu bikorwa by'umwaka wa 2022-2023.

Muri iyi nama kandi hemejwe ko taliki 20 Mutarama 2024 hazaba Inama y'Inteko Rusange idasanzwe ari yo izemeza igihe hagomba kubera amatora ya Komite nyobozi nshya kuko iriho izasoza manda yayo taliki 26 Gashyantare 2024.



## Cycling : Muhoza na Ingabire begukanye "Akagera Rhino Race 2023"

Taliki 26 Ukuboza 2023 habaye isiganwa ry'amagare "Akagera Rhino Race 2023" ryateguve n'ishyirahamwe ry'umukino w'amagare mu Rwanda "FERWACY" ku bufatanye na Friends of Akagera National Park ndetse n'Akarere ka Kayonza.

Iri siganwa ryatangiriye mu Mujyi wa Kigali risorezwa i Rwinkwatu mu Karere ka Kayonza. Uretse icyiciro cy'ababigize umwuga, hari n'abasiganwe mu cyiciro cy'abaturiye Parike y'Akagera bakoresha amagare asanzwe aho basiganwe kilometero 35.

### Uko isiganwa ryagenze

- Men Elite (73.8 km)

1. Muhoza Eric 01h48'05"
2. Manizabayo Eric 01h48'07"
3. Ngendahayo Jeremie 01h48'39"

- Men U-23 (73.8 km)

1. Muhoza Eric 01h48'05"
  2. Ngendahayo Jeremie 01h48'39"
  3. Niyonkuru Samuel 01h48'41"
- Women Elites & U-23 (73.8 km)
1. Ingabire Diane 02h00'33"
  2. Mwamikazi Jazilla 02h00'35"
  3. Ntakirutimana Marthe 02h06'43"





Website: [www.olympicrwanda.org](http://www.olympicrwanda.org)

[www.olympicrwanda.org/commonwealth](http://www.olympicrwanda.org/commonwealth)

Email: [cnosr@olympicrwanda.org](mailto:cnosr@olympicrwanda.org) | [Twitter](https://twitter.com/RwandaOlympic) [Facebook](https://facebook.com/RwandaOlympic) [Instagram](https://instagram.com/RwandaOlympic) [YouTube](https://youtube.com/RwandaOlympic) @RwandaOlympic

Address: Remera-Hallmark Center Building KG 17 Ave